

欽定剿平三省邪匪方略

欽定剿平三省邪匪方略續編卷二十九

甲子年

六月二十日

丁丑

額勒登保德楞泰賽冲阿奏言

臣

等昨督兵在線朗坪二蹬巖等處剿殺賊匪

後該逆敗竄放馬厰二十七日官兵分路進攻

該匪膽敢在老林憑險擲石抗拒

臣

賽冲阿同

豐紳馬瑜策勵兵勇奮力上搶鎗箭所到眼見

斃賊數名均被該匪將屍身拖回我兵愈攻愈

力該匪始敗向長房嶺逃竄查看地勢盡係叢  
竹密林隨令兵勇一面施放排鎗一面砍路進  
逼該匪見我兵轟逼而進復捨死撲出兵勇等  
在林內用刀矛與賊互相砍殺當斃執旗賊目  
一名矛手五名該匪力不能支始向包穀廠桃  
花埡竄去我兵追至埡口沿途又擒獲三名  
臣  
德楞泰督兵策應我兵轉戰一日且老林路徑

險仄隨於林邊暫紮惟時

臣

額勒登保派出之

叅將哈豐阿侍衛色克通阿與楊遇春均帶兵

趕到楊遇春查看懸崖峭壁萬難仰攻當商令

哈豐阿色克通阿親勘險要處所分撥兵勇設

伏又令副將吳廷剛叅將祝廷彪帶兵前赴獅

子洞十里坪一帶依傍老林設伏

臣

額勒登保

又於存營兵丁中挑派五百名每百人爲一隊

不帶鍋帳分赴貝母池青草坪觀音硯新開場  
等處在老林內設伏以杜該匪乘間北遁二十  
九日夜半該匪欲從小寒溪老林竄出哈豐阿  
等隨令兵勇施放鎗礮轟擊該匪仍折回老林  
天明查看林外有擊斃屍身二具初一日據  
額勒登保派往貝母池設伏之守備保元龍差  
兵高貴魏炳泰來營稟報前赴老林探賊於長

槽地方遇見執矛賊匪三名當卽向前擒獲劉  
明盛一名其二人滾巖脫逃臣當將劉明盛嚴

訊據供我們昨夜欲由小寒溪竄出又被官兵

鎗礮轟回大家商量由貝母池北走王家壩差

我前來採路等語當卽凌遲處死隨將匪蹤飛

行各路臣德楞泰賽冲阿得信督率豐紳馬瑜

田朝貴喜明各帶兵勇分路由苦草坪郭耳坪

向家巖穿越老林隨修隨進林中處處懸崖仄

徑險峻異常臣賽冲阿與豐紳馬瑜暨鎮將等

皆徒步督兵進逼直入大梁深處該匪不能存

紮又避向東趨初三日黎明叅將祝廷彪守備

齊慎挑帶兵勇五百名入林分佈預備掩襲詎

該匪於峯頂伏匿哨見祝廷彪等兵勇已過分

爲兩起於午後潛向十里坪竄出意圖攻撲營

卡副將吳廷剛都司呂天俸當卽分督兵勇截  
殺祝廷彪等聽聞鎗礮聲響知賊匪已由林內  
逸出當卽帶領兵勇趕回協剿賊匪見官兵前  
後截殺仍卽折回老林我兵分投追擊斃賊九  
名生擒二名該匪現在有趨乾溝河馬家坪之  
勢連日弁兵鄉勇中間有傷亡容俟查明容部  
辦理楊遇春現督同吳廷剛等抄赴馬家坪迎



剿臣額勒登保帶同劉瑞副將唐文淑等由修

理山紅花梁後坪顧北抄截臣德楞泰賽冲阿

督同豐紳等由筭子坪背灣子分投前進總期  
卽得勝仗上慰

宸懷至總兵王兆慶所剿零星匪前在丁家山被剿後  
分起逃入黃墩一帶現據王兆慶稟報此起零星  
匪先經遊擊廖世俊楊得升帶兵追捕趕至長

板溪斃賊一名擒獲一名嗣王兆夔率同王英黃傑搜至花椒坪大梁王英黃傑帶領兵勇入林掩殺斃賊四名生擒七名訊據獲犯供稱此起零星湊合之匪共有二十九人今被衝殺十幾人其餘各自逃遁等語訊明後當將獲犯正法其餘剩匪犯十餘人現飭王兆夔仍督同將備分路搜拏以期根株淨絕

同日額勒登保又奏言

臣仰沐

聖上恩慈畀以師干重任數年之間仰賴

睿謨指示業將羣惡以次掃除尙存二百餘賊實係

臣

一人未竟之責今春復

命來營督辦竊望與德楞泰賽冲阿會合籌商於一

兩旬內趕剿殄除上紓

宵旰迺

臣

等竭盡心力分投趕剿仍未能悉數殄除

仰蒙

聖主訓飭矜全臣與德榜秦業將實在情形兩次奏

陳

聖鑒目前最要之事自以安插鄉勇爲亟臣熟知刻

下殘匪無多原不必再藉鄉勇之力因念從前

曾有微勞現在隨征亦與兵丁無異未便一時

全行散遣致啟其疑是以除將年老傷病不甚

得力及自願告遣者先行分別遣撤外現在陝  
省原募鄉勇共計一千二百餘名四川原募鄉  
勇共計二千三百餘名業經奏定章程可以妥  
爲安置至楚省鄉勇未經撤遣者聞有五六百  
名有吳熊光自行辦理至臣等昨奏添調川兵  
二三千名至太平大寧開縣邊界分段暫駐係  
爲扼截賊匪竄逞且所謂卽係剽兵並非因各

該境內現有伏而未起之賊預爲設備此係實

情臣現年五十有七精力未應就衰惟因出師

七次從事行間三十餘載曾經帶傷並受風寒

暑濕夙多疾病此次來營精力迥不如前每日

需服藥劑徒步已覺不能兩旬以來舊疾復發

胸膈脹滿更兼頭暈心跳兩腿痛楚遇上前督

率之時實有不能支持之勢現在一面嚴催提

鎮等加緊趕辦一面服藥調治以冀速痊據醫  
生診視驟難痊愈刻下自知辦理遲滯萬一不  
能親自督率再有貽誤罪愈莫追不敢不據實

陳明均奏入

上命軍機大臣傳諭額勒登保曰額勒登保久歷戎  
行備嘗辛苦今因急於剿賊舊疾復發每遇督兵  
進剿之時實有不能支持之勢朕心實爲屛念目

今天氣暑熱川省深山老林又多雨水一切難於  
調撥况該處零匪本派德楞泰賽冲阿督兵剿捕  
若額勒登保仍在彼帶兵德楞泰等又未免意存  
推讓轉有鬆勁所有川省奔竄零匪竟交德楞泰  
督同賽冲阿等剿辦以專責成額勒登保即可回  
至西安調理現在降旨令德楞泰以欽差大臣兼  
成都將軍度於一切剿辦事宜呼應較靈額勒登



保接奉此旨將欽差大臣關防交德楞泰接受伊  
卽順帶鄉勇一千二百名搜捕沿途未盡零匪其  
從前帶往之百順彥丕勒等六人著額勒登保察  
看其中有帶兵得力者卽留於川省交德楞泰差  
遣其餘酌量帶回額勒登保抵陝後仍可會同該  
省督撫妥籌散遣鄉勇等事昨已降旨令那彥成  
署理陝甘總督馳赴西安省城與方維甸面商一

切善後事宜所有額勒登保帶回鄉勇卽遵照前  
旨或歸營伍或充壯役其不願當差者亦令各地  
方官妥爲安插並令該地方官出具收管甘結以  
期永臻寧謐現派乾清門侍衛慶惠帶同御醫馳  
驛前赴西安看視額勒登保病症額勒登保回至  
陝省卽先令慶惠回京覆命俟病勢痊愈額勒登  
保可乘坐肩輿緩程回京卽遲至八九月間亦無

不可不必因七月內朕赴熱河急於前來隨扈

上命軍機大臣傳諭德楞泰曰此次官兵分路進剿  
先後擒斬二十餘名賊匪於官兵搜捕時只在老  
林憑險擲石抗拒並無別項器械可見勢已窮蹙  
人數亦未增添但我兵尙未能痛加截剿立于殲  
除殊不滿意現在頭勒登保陳明舊病復發每遇  
上前督率之時實有力不能支之勢朕心甚爲厪

念已派乾清門侍衛慶惠帶同御醫前往診視令  
額勒登保回至西安調理所有川陝邊界零匪卽  
交德楞泰一人專辦並將欽差關防移交德楞泰  
收用此時零匪若指日在川境辦完固屬甚善萬  
一被剽緊急竄至陝楚邊界德楞泰當窮賊所向  
跟蹤追剿伊旣係欽差隨處調遣呼應較靈一俟  
殘匪掃除德楞泰將關防交勒保收貯將來伊來

京瞻觀卽可順便帶回不必特派員弁先行賞送  
賽冲阿現隨德楞泰剿捕自當聽其調遣嗣後奏  
報軍務摺內賽冲阿不必列名德楞泰自接辦殘  
匪誤聽鄉勇詭計意在招降坐失事機至今未能  
蕲事皆係伊一人因循遲誤所致昨經朕權其罪  
之輕重分別示懲不特額勒登保到營未久爲伊  
分過卽賽冲阿到彼協剿已在德楞泰接辦之後

其獲愆亦係因伊波及德楞泰寧尙不知感愧奮  
勉以圖後效乎此時雨水盛行暑氣蒸熱其遲延  
尙屬有因轉瞬卽交秋令氣候涼爽正當整頓兵  
力儘七月內將成股之賊全行殄滅其餘打散潛  
匿深山零匪應會同勒保飭令地方官實力搜緝  
務令一律肅清倘再仍前延玩不能再爲曲貸是  
德楞泰前功盡棄豈不可惜若能依限肅清不但

復還降革等項並當重加懋賞逾格施恩勉之望  
之至添調川兵二三千名現據額勒登保奏稱並  
非因太平等處有伏而未起之賊預爲設備祇係  
分段駐防此項兵丁與其扼要防禦徒助聲援何  
不於隨營征兵內擇其老弱疲乏者就近抽換俾  
剿捕更資得力再隨征鄉勇內除陝省之一千二  
百餘名現已令額勒登保帶回西安分別安插外

其川省鄉勇二千三百餘名候事竣後當與勒保  
會商遵照節降諭旨妥爲安置其總兵王兆慶所  
剿零匪已被衝殺十數名所剩不過十餘人無難  
剋期剿盡德楞泰務督令該鎮等上緊搜拏將擒  
獲要匪訊明辦理設有一二逃竄餘匪仍責成地  
方官一體嚴緝毋使一名漏網近來德楞泰軍營  
奏報每隔旬餘未免過遲嗣後著間七八日具奏



情形一次用慰朕注

二十九日

丙戌

額勒登保德楞額奏賽冲阿奏言竊

該匪被剿東宮戰場遇春督同哈豐阿色克通阿

吳廷剛祝廷彪等帶領兵勇跟蹤追剿

臣

額勒

登保督同劉瑞等帶領兵勇由後坪馳赴新田

壩抄截途次據楊遇春呈報初六日行抵母猪

峽探報該匪竄至萬春河攻圍龍頭寨相距七

八十里卽派令哈豐阿色克通阿祝廷彪帶兵  
趕往該匪尙在龍頭寨山梁未會起竄當卽督  
兵搶攻鎗箭齊發斃賊數名逃出被擄難民二  
十一名訊明釋放該匪奔上大坪山梁楊遇春  
接續趕到卽搶上大坪紮營顧遇東北賊匪上  
柴扒老林藏匿等情臣額勒登保當卽由新田  
壩大黃溪趕抵萬春河詢知楊遇春舊傷處所

紅腫疼痛不能穿衣行動已派令哈豐阿色克  
通阿吳廷剛祝廷彪等分帶兵勇由茶園溪黃  
柏扒二臺坪官棚子顧定西北覓路攻剽楊遇

春卽於大坪暫紮扼截東北

臣

額勒登保於次

日黎明親往查看賊屯並毗連柴扒之元嶺大  
山一帶周圍均屬險山老林叢密異常當派妥  
弁目兵攀援而上偵知有賊匪藏匿飛行回報

臣 卽飭令叅將祝廷彪都司朱福壽帶領兵勇

於柴扒後身晒路上梁拏卡以備進攻適接賽

冲阿來信正督同豐紳馬瑜田朝貴喜明等帶

領兵勇由茶山壩先後趕抵渣羅盤添紫城探

蹤進剿臣 當卽飛行知會賽冲阿可以就近進

攻豐紳馬瑜等帶兵在添紫城距賊屯之所不

過數十里卽由該一路自南向北進攻傳令於

十二日五鼓一齊進兵直搗賊屯以期一鼓蕩  
洗又分飭哈豐阿吳廷剛等亦顧定西北而進  
十二日五鼓官兵分路進攻晒探賊屯處所見  
溝內烟火濃起並有旗幟矛桿插立衆官兵俱  
以賊匪尙未起竄隨分投覓路下至賊屯詎料  
該匪先已逃遁故留屯聚形跡當卽查晒匪蹤  
由林內翻越大堽口向南奔逸卽係添紫城一

帶臣額勒登保卽飛令豐紳馬瑜田朝貴迎探

堵截並知會賽冲阿帶兵仍向鳳凰坡趕回渣  
羅盤以截該匪竄向東南之路嗣據豐紳馬瑜  
報稱該一帶道路險峻紛歧先令遊擊蕭太和  
於天師池拏卡叅將羅思舉在一碗水拏卡以  
防該匪南竄並顧後路糧運豐紳馬瑜田朝貴  
仍帶同馬元蕭太和等由添紫城三义口而進

途次聽聞天師池營卡有鎗礮之聲知賊匪竄  
出隨即督兵折回趕赴天師池該匪已於卡傍  
疾趨而過竄至對面老林官兵尾追上至老林  
十餘里賊蹤四散隨撤回暫紮等情並據報稱

臣額勒登保派赴豐紳馬瑜一路催令進兵之

藍翎把總李得兵丁羅興隆行抵天師池林中

賊匪突出猝不及防被賊圍去等情臣伏查添

紫城一帶係在賊屯之南最爲緊要

臣

賽冲阿

令豐紳馬瑜田朝貴帶領兵勇四五千名以資

攻剿

臣

額勒登保又節次檄飭令其覓路進攻

乃該提督等因道路險阻未能迅速進剿致賊

匪乘間偷越實有應得之咎本應卽行嚴叅治

罪惟念該提督等數年剿賊尙有微勞刻下帶

兵亦須熟手應懇



皇上天恩將豐紳馬瑜革去巴圖魯名號摘去花翎  
田朝貴革去提督銜稍示薄懲俾帶兵各員共  
知儆惕仍責令該提督等立功自贖現在賊匪  
奔向西南白沙河有趨圍城之勢已嚴飭豐紳  
馬瑜田朝貴等帶兵追躡又令哈豐阿吳廷剛  
祝廷彪等各帶兵勇由官棚子西流溪顧住西  
北臣賽冲阿同喜明由渣羅盤十二嶺顧南接

續趕剿臣額勒登保亦卽趕往策應本日接德

楞泰來信連日因染患瘧疾轉成痢症頗難支  
持在開縣高坪暫紮連服藥劑精力尙覺困憊

臣額勒登保患病連服藥劑雖胸膈稍寬仍覺  
頭暈腿疼但當此事勢萬緊總當同心竭力趕  
剿以冀稍贖罪愆上紓

聖庠再據豐紳派出搜緝零匪之外委臧青雲在魚

谷溪緝獲零匪一名又據王兆稟報王英黃傑帶勇搜緝零匪在大寧屬之中黃溪老林等處搜獲零匪二名殲斃賊匪二名所有生擒各犯訊明均係陳賊卽行正法查此起零匪除節次搜獲殲斃外尙有十餘人已由後坪西竄經遊擊畢萬年帶兵搜捕是賊匪已深入川境有兵接辦臣已飭王兆稟將王英等撤回陝邊與

各官兵聯絡搜緝奏入

上命軍機大臣傳諭額勒登保德楞泰曰額勒登保等奏連日督兵趕剿殘匪情形據稱賊匪詭計虛放烟火遍插旗幟矛桿故留屯聚形跡而額勒登保等分投布置竟毫無偵探致爲賊匪所悞豈非直同兒戲耶現在賊匪由添紫城奔向西南白沙河有趨圍城之勢該處係賽冲阿專派豐紳馬瑜

田朝貴帶兵在彼攔截乃該提督等未能迅速進剿竟任賊匪乘間偷越本應革職治罪第念伊三人數年隨征尙有微勞著姑照所請將豐紳馬瑜革去巴圖魯名號摘去花翎田朝貴革去提督銜稍示薄懲並傳諭伊等當倍知感愧奮勉立功如能上緊殺賊不但可贖前愆尙當加之獎賞倘再有貽誤必當從重治罪不能再邀寬貸現據摺內

稱德楞泰因染患瘧疾轉成痢症頗難支持在開  
縣高坪暫紮服藥等語前因額勒登保舊疾復發  
當經降旨令其回至西安養病將欽差大臣關防  
交德楞泰接受以專責成今德楞泰又患瘧痢額  
勒登保忠勤素著當此剿捕喫緊之際即使接奉  
前旨亦必不肯逕回西安德楞泰所患瘧痢較重  
著回至開縣上緊調治額勒登保仍帶欽差大臣

關防在彼督捕如德楞泰不日就痊可以督兵進剿額勒登保仍應遵照前旨將欽差大臣關防交與德楞泰接受伊卽回西安調養倘德楞泰一時未能痊愈現已降旨令英善署理四川總督勒保前赴軍營接辦軍務額勒登保俟勒保到時將欽差關防交伊接受再回西安勒保未到以前額勒登保仍督催各將領上緊追捕現在夏令將盡天

氣漸近涼爽正當迅勉圖攻殲除淨盡倘能於勒保德楞泰未到時一律殄平方爲全始全終盡美盡善仍係額勒登保之功朕當加之懋賞勉之望之並著慶惠帶同御醫赴額勒登保軍營診視後再赴開縣診視德楞泰病症至另摺奏陝省隨營鄉勇現祇剩一千二百餘名川省原募鄉勇祇剩二千三百餘名額勒登保已札致方維甸勒保於



陸續撤遣後分別安置務宜遵照節次諭旨妥協辦理毋令稍有滋事

上又命軍機大臣傳諭勒保英善曰本日據額勒登保等奏親督官兵追剿殘匪情形額勒登保力疾督戰該匪仍乘間奔逃並稱德楞楞泰現在染患瘡疾轉成痢症難以支持在開縣所屬之高坪地方服藥調治等語現當搜捕零匪喫緊之際德楞泰

所患痢疾一時不能就痊已飭令駐劄開縣醫治  
並將額勒登保暫留軍營督辦一切勒保確探德  
楞泰病勢情形如於日內業已痊愈伊仍遵前旨  
接收欽差關防勒保自可毋庸馳往若德楞泰調  
攝需時勒保卽應赴大寧太平一帶與額勒登保  
會晤接辦俾額勒登保仍回西安調理所有欽差  
大臣關防卽著勒保管帶其總督事務自難兼顧

著英善馳回四川省城接署勒保俟交卸後卽前  
赴軍營督辦伊係本省總督剿捕零匪本屬分內  
應辦之事應卽督飭各鎮將等將成起之賊上緊  
殄滅其打散及潛匿深山餘匪仍嚴飭地方官實  
力搜緝一律肅清不留餘孽如德榜泰病症痊愈  
已赴軍營接收欽差大臣關防勒保卽無庸前往  
帶兵英善亦不必署理督篆

上又命軍機大臣傳諭英善曰英善業經奏報五月十一日自西藏起程在途行走現因川省零匪尙未辦竣德楞泰染患痢疾已有旨令勒保前赴太平等處辦理剿捕事宜四川總督事務關係緊要卽著英善暫行署理若德楞泰業已病痊無需勒保前往辦賊英善仍遵旨回京可也

七月初六日

壬辰

勒保奏言竊

臣

探得王兆慶所

剿平利安康一帶零匪有四五十人分竄川境  
王兆慶等帶領官兵緊躡追剿擒獲十餘名並  
據南充縣戴三錫稟報有雙流石防河兵役王  
家奎等盤獲潰匪二名又據東鄉縣楊世鰲稟  
報擒獲賊匪一名俱解交劉清審辦前此額勒  
登保等咨會勸辦團寨一節

臣仰蒙

皇上切實指示遵卽通行停止至額勒登保前奏准

調官兵二三千名業經預爲挑備近又接德楞  
泰來信囑令將三千名全數調赴軍營以備抽  
換疲乏兵勇是以如數催調起行又額勒登保

一路需用馬匹經

臣

挑撥省標營馬五十匹送

去後續准德楞泰來信又調成都滿營馬二百  
匹卽經副都統文弼如數挑驗分起解往至官  
兵更換帳房除夔州綏定兩處製辦不計外復

據咨調白布單帳房四百架藍布夾帳房三十架已於初二初四初六十四等日全數解清其餘軍裝軍火馱騾弓箭等項亦俱如數解往奏入報

聞

初七日

癸巳

方維甸奏言查黑河一帶匪徒除節

次搜獲外茲據道銜陳和等稟報寶雞縣鄉約

寨長等搜獲張漢潮股內矛手林萬榜一名又  
候補縣丞屠大琮拏獲賊匪四名又南鄭縣知  
縣李師白拏獲賊匪二名現均分別提訊辦理  
又委員縣丞應先杰搜獲零匪二名又縣丞余  
春溥搜獲一名又署沔縣知縣陳肇鰲搜獲一  
名又通判雒昂盤獲匪徒六名又蓋屋縣知縣  
蓋方泌盤獲零匪三名俱已批飭臬司朱勳提



省覆審分別辦理再邊界歸併寨堡之事

臣

已

遵

旨札飭委員等勸諭居民就其自願歸併者辦理並  
不勉強迫促致滋紛擾奏入報

聞

初九日

乙未

額勒登保德楞泰賽冲阿奏言

臣

等

於十四日將在柴扒元嶺一帶老林圍剿情形

奏

聞後十五日

臣

額勒登保督飭侍衛百順總兵劉瑞

等帶兵由渣羅盤官棚子接續色克通阿吳廷

剛哈豐阿等官兵而進

臣

賽冲阿率豐紳馬瑜

田朝貴等由天師池跟蹤而進十五日田朝貴

等進至仰天窩經過賊匪屯紮處所見有戮斃

屍身二軀經兵勇認係十二日被賊圍去之藍

翎把總李得兵丁羅興隆被賊戕害知賊匪竄

蹤未遠

臣

賽冲阿當卽分派鎮將各帶兵勇躡

蹤入林追剿十六日田朝貴等由白巖溝徒步

而進首先趕及賊匪該匪卽據險抗拒兵勇施

放鎗箭斃賊四名生擒二名正在攬殺間喜明

率領副將閻俊烈帶兵趕到協力剿殺又斃賊

二名馬瑜率領副將馬元等帶兵亦由乾河溝

順梁抄出又斃賊三名該匪見官兵雲集卽四散鑽入叢竹密林逃匿向鐵厰溝老林遁去

臣

賽冲阿當卽親率提鎮分路由鳳凰山包穀厰外圍城徒步向西跟追

臣

額勒登保於途次又

接據侍衛色克通阿等稟報親督兵勇等由西流溪一帶覓路探剿十九日探悉賊匪已由團城四方硎一路向西南遁逃有趨朝陽坪之勢

色克通阿等卽催令弁兵由九斗池趕赴黃柏  
扒見林內竹木叢密恐有伏賊傳令兵勇前後  
准備而進我兵上至半山有賊匪數十人在林  
內伏匿窺伺經色克通阿富祥吳廷剛帶兵直  
前施放鎗箭當斃賊四名哈豐阿祝廷彪聞聲  
督催後隊趕往接應適左手林內又有賊匪數  
十衝出經哈豐阿等督飭弁兵奮勇撲入林內

攪殺貴州兵丁徐上才首先衝入賊羣用刀砍  
斷賊矛三桿砍死執旗賊目一名兵丁張先箭  
斃賊匪一名千總聶標文把總應貴帶兵一齊  
衝入刀砍矛戳又斃賊匪五名生擒一名兵丁  
徐上才張先王得良吳興隆羅貴均受矛傷數  
處我兵乘勢施放鎗礮轟擊賊匪四散逃遁所  
有殺賊首級及獲賊等均解送臣額勒登保軍

營驗明辦理

臣

額勒登保卽進抵西流溪趕緊

督飭進兵沿途大山林箐隨砍隨行萬分艱險

查看色克通阿哈豐阿等進兵路徑與賽冲阿

督同提鎮等跟追之處皆係無路密林此一帶

地勢綿亘五六百里並無人烟山高樹大林密

溝深氣候亦迥異平曠之地欲詢門路徑並無

居民僅令弁兵等到處躡探探得直西可通朝

陽坪中谷溪一帶賊屯之處臣飛催色克通阿

哈豐阿等趕緊進剿遂覓路由偏巖子紙廠於

二十二日進抵馬家坪策顧東北二十二日又

據色克通阿哈豐阿報稱帶兵已至朝陽坪賊

匪逃入中谷溪貝母池一帶老林現在踞蹤剿

辦現接臣德楞泰來信連日服藥調治精神漸

好可以支持已探悉賊蹤帶兵由高坪中崗嶺



顧住南面探剿又接

臣

賽冲阿來信豐紳馬瑜

帶領奮勇兵勇由包穀廠徒步跟追賽冲阿督

同田朝貴喜明由龍潭口一帶躡蹤趕剿現由

朝陽坪顧住東面相機探進並據楊遇春差弁

呈報日來加緊服藥舊傷已漸就痊瘡疾尙未

結痂現仍帶兵由新田壩取道娑羅山等處相

距

臣

額勒登保不遠已飭令卽日帶兵來營籌

辦剿捕事宜

臣

額勒登保自抵軍營以來卽與

臣

德楞泰賽冲阿悉心籌商惟恐日久師疲亟

須振作鼓勵謹將疊次遵奉

諭旨勸諭兵勇曉以大義查明兵勇中或有傷病年

老不能得力者卽予遣回其前敵隨征殺賊者

兵丁則懸立重賞鄉勇則加給口糧猶恐主將

不親身上前兵勇或藉詞退縮是以

臣

等亦皆

親身督率每遇險阻無不首先涉歷連日

臣

額

勒登保賽冲阿督率提鎮等在山中追剿數百  
里老林內盡屬合抱大木其下又皆叢棘密竹  
且地勢極高雲霧迷漫陰濕過甚難用火攻其  
中並無居民亦並未見有開墾之土惟有山泉  
流注賊匪樵汲勢難斷絕似此深山密林經由  
大寧開縣太平邊境周圍有三四千里之廣其

險要比比皆是臣等知該匪必於林外偷破寨

砦掠得糧食方可入林屯聚是以前次奏明歸

併大寨以防劫掠一面於應追剿者追剿應抄

截者抄截分投辦理乃該匪一入深林往往設

伏伺襲迨我兵趕至賊匪之前或又竟不竄出

或又他處潛遁以致徒勞無益且該匪等處處

履險蹈危並無顧惜官兵則係用命之人若悉

令置之死地實屬可惜是以剿捕一時不能得

手現在悉心會商妥爲籌辦總期及早蕝事少

贖愆尤再臣額勒登保接准勒保來信據稱現

專差守備穆榮解銀二萬兩以備臣德楞泰兩

路犒賞之用係勒保與司道以下各官公捐養

廉查臣等現在應用照格賞銀尙不短缺所有

勒保解到銀二萬兩現在出具收管暫存應否

仍作軍餉抑作爲賞需之項恭候

命下再行知照德楞泰勒保欽遵辦理奏入

上命軍機大臣傳諭額勒登保德楞泰曰此次各路

鎮將等帶兵躡剿先後殲擒賊匪二十餘名額勒

登保等親身督率將弁兵勇冒暑涉險深入窮追

而且人知憤恨士氣倍揚實屬奮勉出力朕不忍

再加催促惟是奏報三省肅清係上年七月中旬

之事彼時只剩零匪二三百人今已閱一年而賊數並未稍減雖不過偷竄餘生而額勒登保德楞泰二人督兵在外日久未竣自提鎮以至將弁凡若干員帶領兵勇萬餘名搜捕經年迄未淨盡外間無識之徒必致傳說滋疑且使奸徒從而生心殊有關係此時德楞泰病已漸痊業經督兵探剿楊遇春舊傷漸愈正可帶兵殺賊額勒登保體氣

羸弱著仍遵前旨將欽差大臣關防交與德楞泰  
接收伊卽回至西安省城將撤遣鄉勇事宜妥爲  
料理完竣回京供職所有剿捕餘匪事宜著責成  
德楞泰督辦刻下已交秋令天氣高爽非溽暑煩  
熇大雨時行可比正當鼓勵將士多方設法務於  
七月內將此夥餘匪悉數殄除不可再有延緩至  
此次首先衝入賊羣砍死賊目之貴州兵丁徐上



才著卽以把總拔補此外如尙有出力兵勇著一併查明量予陞補其受傷及陣亡者並著查明卹賞以示獎勵前此被賊圍去戕害之藍翎把總李得兵丁羅興隆均著咨部照陣亡例賜卹至所稱兵勇中或有傷病年老不能得力者卽予遣回自應如此辦理又稱賊竄之路係履險蹈危若悉令官兵置之死地實屬可惜等語賊匪亡命奔逃不

過欲倖逃顯戮豈有驅迫官兵冒險輕進陷於死  
亡之理惟在相機設法竭力籌劃試思該匪等日  
於大山林箐竄伏從何覓食自必向外偷破寨砦  
掠食爲生德楞泰等既知其時時冒充官兵於寨  
砦探信何不卽於寨砦左右密行設伏伺賊出掠  
時乘勢掩殺自可得手此等機宜惟在隨時運籌  
調度豈可一味追躡隨賊奔馳致疲兵力又據額

勒登保另摺奏稱據勒保兩次解到銀二萬兩係  
與司道各官公捐養廉以作犒賞一節額勒登保  
素有操守此次勒保解送銀兩額勒登保並未收  
受所見甚是此項銀兩勒保等既已解營著卽作  
爲軍餉可也

十八日

甲辰

額勒登保德楞泰賽冲阿奏言查賊

匪在貝母池一帶往來游奕二十五日半夜乘

大而冀圖竄出經臣額勒登保督派官兵出營

截擊鎗斃二名生擒一名餘匪仍折入老林向

亂石窖竄匿二十七日楊遇春帶兵由安羅山

石家寨入林進剿途次藥棚子與吳廷剛哈豐

阿祝廷彪等官兵會合卽向南踞蹤前進臣賽

冲阿督同豐紳喜明帶兵由乾溪一路進剿另

派馬瑜田朝貴帶兵由金竹坪一路進剿該匪

因官兵分道進逼又折竄謝家灣厚朴坪一帶

老林二十八日臣賽冲阿督同豐紳喜明向厚

朴坪右手山梁砍路而進分投掩殺當經斃賊

四名該匪卽從密林敗上大梁豐紳喜明催令

官兵仰攻而上維時馬瑜田朝貴由金竹坪向

厚朴坪左手老林而進聽聞鎗聲卽催兵趨行

正遇賊匪竄來當經斃賊二名該匪四散鑽林

逃匿兩路官兵分投追搜又殺賊三名該匪向

雙坪十里坪奔竄

臣

德楞泰探悉賊蹤卽派遊

擊涂陞帶兵五百名扼要迎擊詎該匪探知前

路有兵又折向東南逃遁復折向東北新田壩

桃木坪有奔桐油壩百里荒之勢隨督飭豐紳

馬瑜田朝貴接續楊遇春官兵迅由西流溪取

道進剿該提鎮等現於西流溪會合商同於各

隊內挑出趨健兵丁四千餘名星馳前往分投

趕辦

臣

額勒登保查賊匪現竄地方係大寧太

平交界東北可出大小漁河雞心嶺黃墩兩扇

門入仙河均近陝界當卽取道高觀寺兩扇門

一帶進發由西北扼顧陝界現與德楞泰相距

不遠一面知會前來一面將剿辦機宜再行悉

心商確以期迅速集事再

臣

等前據陝安鎮總

兵王兆稟報詢明王英黃傑所帶鄉勇三百  
名內有情願入伍者六十餘名餘俱情願回籍

臣現卽飭令查照章程分起辦理連日臣與楊

遇春所帶各勇內又有情願回籍及傷病不能

得力者計一百七十餘名臣均親加點驗妥爲

散遣臣前奏陝省原募鄉勇尙有一千二百餘

名計此時入伍撤遣外現存鄉勇實祇八百餘



名臣德楞泰所統隨征鄉勇計此時又陸續撤遣一百五十三名及陣傷亡故外現存一千八百餘名昨接勒保來信所有添調新兵三千名已飭總兵馬國銳帶領不日可到俟此項新兵到營更可將鄉勇一律撤竣奏入

上命軍機大臣傳諭額勒登保德楞泰曰額勒登保等奏連日督兵趕剿賊匪雖殺賊十數名然總未

能痛加殲戮上年中元奏報三省肅清今又已過  
中元而賊匪仍有二百餘人未能剿淨現在額勒  
登保已知會德楞泰前來相機籌辦務須上緊設  
法將大寧太平交界竄匿之賊於七月內一律掃  
除額勒登保仍遵前旨先回西安並沿途搜捕零  
匪到陝後與方維甸妥議一切善後事宜緩程來  
京此時川陝鄉勇除情願入伍外其陸續遣撤者

又有數百名統計隨營征勇陝省不過八百餘名  
川省不過一千八百餘名額勒登保等因派調新  
兵三千名卽日可到擬將川陝鄉勇一律裁撤所  
見甚是新兵到營不但鄉勇應行撤遣卽兵丁中  
凡有日久疲乏及老弱傷殘病廢者均應分別澄  
汰酌量裁撤或恐新兵初到該省路逕不熟則將  
舊兵酌留一半足矣現在餘匪不過二百餘人新

兵三千不啻十倍於賊况有各路舊兵協力剿捕  
是兵數竟數十倍於賊可不倍加迅勉剋日蕩事  
乎